

Ovaj, osmi broj *MUALLIMA* tematski je najvećim dijelom posvećen Okruglom stolu koji je u organizaciji Udruženja ilmijje IZ-e u BiH, odnosno našeg časopisa i uz podršku Reisu-l-uleme održan 3. i 4. novembra 2001. godine u Sarajevu. Tema spomenutog okruglog stola bila je *Obrazovni sistem u Islamskoj zajednici*. O nekim značajnim pitanjima, kao što su vjersko-prosvjetni kadar IZ-e danas, nastavni planovi i programi naših medresa, akademija i Fakulteta islamskih nauka, potreba za pedagoškim zavodom, naučnim institutom i različitim usmjerenim programima u medresama i akademijama, imamski poziv u suvremenim društvenim uvjetima, strategija obrazovanja u Islamskoj zajednici, reforme obrazovnog sistema Islamske zajednice u BiH u dvadesetom stoljeću, raspravljalo je četrdesetak učesnika ovog okruglog stola. Među njima su bili Reisu-l-ulema IZ-e u BiH dr. Mustafa efendija Cerić, predsjednik Sabora IZ-e u BiH mr. Hilmo Neimarlija, dekan Fakulteta islamskih nauka u Sarajevu dr. Jusuf Ramić, dekani islamskih pedagoških akademija, direktori medresa, muftije, profesori Fakulteta islamskih nauka, islamskih pedagoških akademija i medresa kao i drugi ugledni prosvjetni i javni radnici u Islamskoj zajednici, u bošnjačkom narodu i u bh. društvu.

Da se podsjetimo, Redakcija časopisa *Novi MUALLIM JE* u 2000. godini organizirala jednodnevni kolokvij o hutbi kao važnom mediju vjerskog života i vjersko-prosvjetnog djelovanja

Islamske zajednice. Na tom kolokviju njegovi sudionici došli su do određenih zaključaka i preporuka koje su upućene Rijasetu Islamske zajednice. Spomenuti zaključci i preporuke dugo su čekali da dospiju na dnevni red i budu razmatrani na jednoj od sjednica vrha Islamske zajednice. I poslije toga, sve do danas nije se mogao steći dojam da će nešto od tih zaključaka i preporuka stvarno zaživjeti u administraciji i u životu Islamske zajednice. Dijelom otuda, a dijelom i iz nekih drugih iskustava, neki su sudionici Okruglog stola *Obrazovni sistem u Islamskoj zajednici*, kada smo pokretali pripreme za njegovo održavanje bili skeptični u pogledu njegove praktične svrhe. Ipak, ovaj je okrugli sto održan ozbiljno i odgovorno. U njega je uloženo mnogo više nego u predhodni kolokvij o temi "Kakve nam hutbe trebaju?"

U nadi da će za Preporuke Okruglog stola o obrazovnom sistemu u Islamskoj zajednici biti više sluha u Islamskoj zajednici, u našim obrazovnim institucijama, kod naših čitalaca i u javnosti, te u želji da produžimo i proširimo raspravu o obrazovanju i obrazovnim institucijama u Islamskoj zajednici, u ovom broju *MUALLIMA* objavljujemo uvodničarska saopćenja o najvažnijim temama o kojima se razgovaralo na spomenutom okruglom stolu, najveći dio rasprava koje su vođene o određenim pitanjima, uvodno i završno obraćanje Reisu-l-uleme i zaključke, preciznije, Preporuke Okruglog stola o obrazovnom sistemu u Islamskoj zajednici.